

Drafft Ymgynghori

Rheoliadau Drafft a osodir gerbron Cynulliad Cenedlaethol Cymru o dan adran 142(3)(b)(ii) o Ddeddf Tai (Cymru) 2014, i'w cymeradwyo drwy benderfyniad Cynulliad Cenedlaethol Cymru.

OFFERYNNAU STATUDOL
CYMRU

2015 Rhif (Cy.)

TAI, CYMRU

Rheoliadau Digartrefedd (Bwriadoldeb) (Categoriâu Penodedig) (Cymru) 2015

NODYN ESBONIADOL

(Nid yw'r nodyn hwn yn rhan o'r Rheoliadau)

Mae Adran 78 o Ddeddf Tai Cymru 2014 yn darparu na chaiff awdurdod lleol roi sylw i fwriadoldeb wrth asesu ceisydd am gymorth ynghylch digartrefedd, oni bai ei fod wedi penderfynu rhoi sylw i un neu ragor o'r categorïau o geiswyr a bennwyd gan Weinidogion Cymru. Mae Adran 78(1) o'r Ddeddf yn gosod rhwymedigaeth ar Weinidogion Cymru i wneud rheoliadau i bennu categorïau o'r fath.

Drwy'r Rheoliadau hyn, mae Gweinidogion Cymru yn pennu rhestr o gategoriâu o geiswyr at ddibenion adran 78. Mae'r rhestr hon yn Rheoliad 2. Mae wedi ei seilio ar adran 70 o'r Ddeddf, sy'n nodi'r rhestr o'r personau sydd mewn angen blaenoriaethol am lety.

Gan ddibynnu ar y pŵer sydd yn adran 142(2)(c) o'r Ddeddf, mae'r Rheoliadau hyn hefyd yn gwneud darpariaethau canlyniadol, atodol a throsiannol. Disgrifir y rhain isod.

Mae Rheoliad 3 yn darparu bod rhaid i awdurdod tai lleol roi hysbysiad ysgrifenedig o'i benderfyniad i roi sylw i fwriadoldeb i Weinidogion Cymru, o leiaf 14 o ddiwrnodau cyn iddo gael effaith. Rhaid i'r hysbysiad bennu'r categori neu gategoriâu o geiswyr y bydd yr awdurdod lleol yn ystyried bwriadoldeb mewn perthynas â hwy. Rhaid i'r hysbysiad hefyd gynnwys rhesymau dros benderfynu rhoi sylw i'r categori neu'r categorïau a bennwyd.

Mae Rheoliadau 4 a 5 yn gwneud darpariaeth ar gyfer cyhoeddi hysbysiad o benderfyniad. Yn benodol,

Drafft Ymgynghori

rhaid cyhoeddi'r hysbysiad ar wefan yr awdurdod tai lleol a rhaid bod copi ohono ar gael, yn ddi-dâl, i'r ceiswyr yr effeithir arnynt.

Mae Rheoliad 6 yn darparu na chaniateir diwygio'r penderfyniad fwy na dwywaith y flwyddyn. Mae hefyd yn egluro bod rhaid cyhoeddi hysbysiadau o benderfyniadau a ddiwygiwyd mewn ffordd debyg i'r hysbysiadau gwreiddiol.

Mae Rheoliad 7 yn atal awdurdod tai lleol rhag ystyried bwriadoldeb mewn perthynas â cheiswyr presennol y mae'r ddyletswydd o dan adran 62(1) o'r Ddeddf yn ddyledus iddynt, cyn bod yr awdurdod yn penderfynu rhoi sylw i fwriadoldeb.

Mae Rheoliad 8 yn gymwys i geisydd presennol am gymorth, y mae dyletswydd i asesu o dan adran 62(1) o'r Ddeddf yn ddyledus iddo ar yr adeg pan fo unrhyw newidiadau yn cael eu gwneud i gategorïau. Mae Rheoliad 8(1)(a) yn darparu na chaiff yr awdurdod roi sylw i fwriadoldeb mwyach wrth asesu cais os yw ceisydd o'r fath mewn categori sy'n cael ei dynnu o'r rhestr o gategorïau.

Ar y llaw arall, os yw ceisydd o'r fath mewn categori sydd wedi ei gynnwys mewn rhestr o gategorïau tra bo'r cais am asesiad yn cael ei ystyried, yna mae Rheoliad 8(1)(b) yn darparu na fydd yr hysbysiad yn effeithio ar y ceisydd hwnnw ac na chaiff awdurdod roi sylw i fwriadoldeb y ceisydd hwnnw.

Drafft Ymgynghori

Rheoliadau Drafft a osodir gerbron Cynulliad Cenedlaethol Cymru o dan adran 142(3)(b)(ii) o Ddeddf Tai (Cymru) 2014, i'w cymeradwyo drwy benderfyniad Cynulliad Cenedlaethol Cymru.

OFFERYNNAU STATUDOL
CYMRU

2015 Rhif. (Cy.)

TAI, CYMRU

**Rheoliadau Digartrefedd
(Bwriadoldeb) (Categoriâu
Penodedig) (Cymru) 2015**

Gwnaed ***
Yn dod i rym ***

Mae Gweinidogion Cymru yn gwneud y Rheoliadau a ganlyn drwy arfer y pwerau a roddwyd iddynt gan adrannau 78(1) a 142(2) o Ddeddf Tai (Cymru) 2014(1).

Yn unol ag adran 142(3)(b)(ii) o'r Ddeddf honno, gosodwyd drafft o'r offeryn hwn gerbron Cynulliad Cenedlaethol Cymru a'i gymeradwyo drwy benderfyniad gan Gynulliad Cenedlaethol Cymru.

Enwi, cychwyn a dehongli

1.—(1) Enw'r Rheoliadau hyn yw Rheoliadau Digartrefedd (Bwriadoldeb) (Categoriâu Penodedig) (Cymru) 2015.

(2) Daw'r Rheoliadau hyn i rym ar ***.

(3) Yn y Rheoliadau hyn—

ystyr “rhestr o gategoriâu penodedig o geiswyr” (“*list of specified categories of applicants*”) yw'r categori neu'r categorïau o geiswyr(2) y mae awdurdod tai lleol wedi penderfynu rhoi sylw i ba un a yw ceiswyr wedi dod yn ddigartref yn fwriadol ai peidio mewn perthynas â hwy.(3)

(1) 2014 dccc 7.
(2) Fel y'u diffinnir gan adran 62(3).
(3) Gweler adran 78(2).

Drafft Ymgynghori

(4) Yn y Rheoliadau hyn, mae cyfeiriadau at adrannau yn gyfeiriadau at adrannau o Ddeddf Tai (Cymru) 2014.

RHAN 1

Categoriâu Penodedig

Categoriâu o geiswyr at ddiben adran 78

2. Mae'r canlynol yn gategoriâu o geiswyr at ddiben adran 78 (penderfynu rhoi sylw i fwriadoldeb) —

- (a) menyw feichiog neu berson y mae'n preswyllo gydag ef neu y gellid disgwyl yn rhesymol iddi breswyllo gydag ef;
- (b) person y mae plentyn dibynnol yn preswyllo gydag ef neu y gellid disgwyl yn rhesymol iddo breswyllo gydag ef;
- (c) person—
 - (i) sy'n hyglwyf o ganlyniad i reswm arbennig (er enghraifft: henaint, salwch corfforol neu feddyliol neu anabledd corfforol neu feddyliol), neu
 - (ii) y mae person sy'n dod o fewn is-baragraff (i) yn preswyllo gydag ef neu y gellid disgwyl yn rhesymol iddo breswyllo gydag ef;
- (d) person—
 - (i) sy'n ddigartref neu o dan fygythiad o ddigartrefedd o ganlyniad i argyfwng megis llifogydd, tân neu drychineb arall, neu
 - (ii) y mae person sy'n dod o fewn is-baragraff (i) yn preswyllo gydag ef neu y gellid disgwyl yn rhesymol iddo breswyllo gydag ef;
- (e) person—
 - (i) sy'n ddigartref o ganlyniad i wynebu camdriniaeth ddomestig, neu
 - (ii) y mae person sy'n dod o fewn is-baragraff (i) yn preswyllo gydag ef (ac eithrio'r sawl sy'n cam-drin) neu y gellid disgwyl yn rhesymol iddo breswyllo gydag ef;
- (f) person—
 - (i) sy'n 16 neu'n 17 oed pan fo'r person yn gwneud cais i awdurdod tai lleol am lety neu gymorth i gadw neu gael gafael ar lety, neu
 - (ii) y mae person sy'n dod o fewn is-baragraff (i) yn preswyllo gydag ef neu y

Drafft Ymgynghori

gellid disgwyl yn rhesymol iddo breswyllo gydag ef;

(g) person—

(i) sydd wedi cyrraedd 18 oed, pan fo'r person yn gwneud cais i awdurdod tai lleol am lety neu gymorth i gadw neu gael gafael ar lety, ond nid 21 oed, sy'n wynebu perygl arbennig o gamfanteisio rhywiol neu ariannol, neu

(ii) y mae person sy'n dod o fewn is-baragraff (i) yn preswyllo gydag ef (ac eithrio camfanteisiwr neu gamfanteisiwr posibl) neu y gellid disgwyl yn rhesymol iddo breswyllo gydag ef;

(h) person—

(i) sydd wedi cyrraedd 18 oed, pan fo'r person yn gwneud cais i awdurdod tai lleol am lety neu gymorth i gadw neu gael gafael ar lety, ond nid 21 oed, a oedd yn derbyn gofal, yn cael ei letya neu'n cael ei faethu ar unrhyw bryd pan oedd o dan 18 oed, neu

(ii) y mae person sy'n dod o fewn is-baragraff (i) yn preswyllo gydag ef neu y gellid disgwyl yn rhesymol iddo breswyllo gydag ef;

(i) person—

(i) sydd wedi gwasanaethu yn lluoedd arfog rheolaidd y Goron sydd wedi bod yn ddigartref ers gadael y lluoedd hynny, neu

(ii) y mae person sy'n dod o fewn is-baragraff (i) yn preswyllo gydag ef neu y gellid disgwyl yn rhesymol iddo breswyllo gydag ef;

(j) person sydd â chysylltiad lleol ag ardal yr awdurdod tai lleol ac sy'n hyglwyf o ganlyniad i un o'r rhesymau canlynol—

(i) bod wedi bwrw dedfryd o garchar o fewn ystyr adran 76 o Ddeddf Pwerau Llysoedd Troseddol (Dedfrydu) 2000,

(ii) bod wedi ei remandio mewn carchar neu ei draddodi i garchar gan orchymyn llys, neu

(iii) bod wedi ei remandio i lety cadw ieuenctid o dan adran 91(4) o Ddeddf Cymorth Cyfreithiol, Dedfrydu a Chosbi Troseddwyr 2012,

neu berson y mae person o'r fath yn preswyllo gydag ef neu y gellid disgwyl yn rhesymol iddo breswyllo gydag ef.

Drafft Ymgynghori

RHAN 2

Gweithdrefn ar gyfer rhoi sylw i fwriadoldeb

Hysbysiad o benderfyniad i roi sylw i fwriadoldeb i Weinidogion Cymru

3.—(1) Rhaid i awdurdod tai lleol sy'n penderfynu rhoi sylw i fwriadoldeb ddarparu hysbysiad ysgrifenedig i Weinidogion Cymru o'i benderfyniad.

(2) Rhaid i'r hysbysiad ysgrifenedig bennu—

- (a) y rhestr o gategoriâu penodedig o geiswyr, a
- (b) y rheswm neu'r rhesymau dros roi sylw i'r categori neu gategoriâu sydd wedi eu cynnwys yn y rhestr o gategoriâu penodedig o geiswyr.

(3) Rhaid darparu hysbysiad ysgrifenedig i Weinidogion Cymru cyn diwedd y cyfnod o 14 o ddiwrnodau cyn gweithredu'r penderfyniad i roi sylw i fwriadoldeb.

Cyhoeddi hysbysiad o benderfyniad i roi sylw i fwriadoldeb

4.—(1) Rhaid i awdurdod tai lleol sy'n penderfynu rhoi sylw i fwriadoldeb gyhoeddi hysbysiad o'i benderfyniad —

- (a) ar wefan yr awdurdod (os oes ganddo un), a
- (b) drwy osod copi o'r hysbysiad yn y swyddfeydd lle y daw ceisiadau am gymorth ynghylch digartrefedd i law,

heb fod yn llai na 14 o ddiwrnodau cyn gweithredu'r penderfyniad i roi sylw i fwriadoldeb.

5. Rhaid i awdurdod lleol gymryd camau rhesymol i roi gwybod i geiswyr a'u cynghorwyr am ei benderfyniad ac yn benodol rhaid iddo sicrhau bod copi o'r hysbysiad o'i benderfyniad ar gael, yn ddi-dâl, i geiswyr y bydd y penderfyniad yn effeithio arnynt.

Terfynau ar ddiwygio rhestr o gategoriâu penodedig o geiswyr

6. Ni chaiff awdurdod tai lleol sydd wedi penderfynu rhoi sylw i fwriadoldeb ddiwygio'r rhestr o gategoriâu penodedig o geiswyr fwy na dwywaith y flwyddyn. Mae Rheoliadau 3, 4 a 5 yn gymwys i benderfyniad i ddiwygio rhestr fel y maent yn gymwys i'r penderfyniad gwreiddiol.

RHAN 3

Penderfyniadau ar fwriadoldeb mewn perthynas
â cheiswyr presennol

Effaith penderfyniad i roi sylw i fwriadoldeb ar geisydd presennol

7.—(1) Ni chaiff awdurdod tai lleol sy'n penderfynu rhoi sylw i fwriadoldeb yn unol ag adran 78 roi sylw i fwriadoldeb mewn perthynas â cheisydd presennol.

(2) Yn y rheoliad hwn, ystyr "ceisydd presennol" ("*existing applicant*") yw ceisydd y mae'r ddyletswydd yn adran 62(1) yn ddyledus iddo ar yr adeg pan fo penderfyniad i roi sylw i fwriadoldeb yn cael ei wneud.

Effaith newidiadau i restr o gategoriâu penodedig o geiswyr ar geisydd presennol

8.—(1) Ni chaiff awdurdod tai lleol sy'n rhoi sylw i fwriadoldeb roi sylw i fwriadoldeb mewn perthynas â cheisydd presennol—

- (a) os yw'r awdurdod wedi tynnu un neu ragor o gategoriâu o'i restr o gategoriâu penodedig o geiswyr ac oni bai am hynny y byddai'r ceisydd presennol wedi dod o fewn y rhestr o gategoriâu penodedig o geiswyr, neu
- (b) os yw'r awdurdod wedi cynnwys un neu ragor o gategoriâu yn ei restr o gategoriâu penodedig o geiswyr ac o ganlyniad i hynny mae'r ceisydd hwnnw yn dod o fewn y rhestr o gategoriâu penodedig o geiswyr.

(2) Yn y rheoliad hwn, ystyr "ceisydd presennol" ("*existing applicant*") yw ceisydd—

- (a) sydd wedi ei ddisgrifio ym mharagraff (1)(a) neu (b), a
- (b) y mae'r ddyletswydd yn adran 62(1) yn ddyledus iddo ar yr adeg pan fo newid yn cael ei wneud i'r rhestr o gategoriâu penodedig o geiswyr.

Lesley Griffiths
Y Gweinidog Cymunedau a Threchu Tlodi, un o
Weinidogion Cymru
Dyddiad***